

COMISIÓN INFORMATIVA DE COOPERACIÓN, INFRAESTRUTURAS E MEDIO RURAL

ACTA da mencionada comisión informativa, correspondente ao día **23 de maio de 2024**

Ás 17.10 horas do día 23 de maio de 2024, reúnese a Comisión Informativa de Cooperación, Infraestruturas e Medio Rural, en sesión ordinaria, na sala de xuntas da Deputación Provincial, coa asistencia dos seguintes deputados e deputadas:

Presidente: D. Luís Menor Pérez

Deputados/as do Grupo Popular:

D.^a Marta Nóvoa Iglesias

D. José María Lago Cabo

D.^a Patricia Torres Madureira

D. Xosé Miguel Pérez Blecua

D. Manuel Seoane Rodríguez

Deputados/as do Grupo Socialista:

D. Álvaro Vila Araújo

D. Emilio Luís Díaz Vidal

D. Aurentino Alonso Araújo

D.^a Susana Rodríguez Estévez

Deputados/as do BNG:

D.^a María José Mangana Guede

D. Bernardo Varela López

Deputados de Democracia Ourensana:

D. Antonio Fernández Martín

D. Gonzalo Pérez Jácome

Secretario: D. Juan Marquina Fuentes Fuentes

Interventora: D.^a Begoña Álvarez Matos

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

**1º.- APROBACIÓN DA ACTA DA SESIÓN ANTERIOR, CORRESPONDENTE Á DO
DÍA 17 DE ABRIL DE 2024.-**

A Secretaría Xeral deu traslado do borrador da acta da sesión anterior, correspondente á ordinaria do día 17 de abril de 2024.

Non se producen intervencións e, por unanimidade, a comisión adopta o seguinte acordo:

Aprobar a acta da sesión ordinaria da Comisión Informativa de Cooperación, Infraestruturas e Medio Rural do día 17 de abril de 2024, conforme co borrador elaborado pola Secretaría Xeral.

**2º.- CAMBIO DO MODO DE XESTIÓN DO SERVIZO PÚBLICO, EN RÉXIME DE
COMPETENCIA DELEGADA E CON CARÁCTER INTERMUNICIPAL, DE
RECOLLIDA, TRANSPORTE E TRATAMENTO DE RESIDUOS DE
COMPETENCIA LOCAL DA DEPUTACIÓN PROVINCIAL DE OURENSE.-**

D. José María Lago Cabo, do Grupo Popular, explica o contido da proposta.

D. Bernardo Varela López, do BNG, sinala que con este acordo se dá cumprimento a unha moción aprobada polo Pleno Provincial e que este servizo e todos os concellos da provincia vanse enfrontar aos novos retos que impón a nova normativa. Engade que a Xunta de Galicia non está axudando nada aos concellos que a día de hoxe aínda non sabemos o que vamos ter que pagar a Sogama e se se nos vai seguir aplicando a bonificación do dez por cento. Engade que a Deputación Provincial debería trasladar estas inxedanzas á Xunta de Galicia.

D. Álvaro Vila Araujo, do Grupo Socialista, indica que se trata de dar cumprimento a unha moción do seu grupo e que paralelamente a estes cambios se debe fomentar e potenciar a reciclaxe involucrando a todos os veciños da provincia. Engade que este servizo ten un coste moi importante e que debe autofinanciarse a través das taxas.

D. José María Lago Cabo, do Grupo Popular, sinala que está solicitada unha entrevista con Sogama para aclarar estas cuestións e que a Área de Medio Ambiente está traballando na busca dunha alternativa para cumprir as esixencias da nova normativa, en particular, a taxa por xeración.

Non se producen máis intervencións e, co voto favorable do Grupo Popular (6) e a abstención do Grupo Socialista (4), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

1º. Considerar que a forma máis adecuada para a prestación do servizo público, en réxime de competencia delegada e con carácter intermunicipal, de recollida, transporte e tratamento de residuos de competencia local da Deputación Provincial de Ourense, polos motivos acreditados no expediente de referencia, é a de xestión directa, a cal deberá prestarse a través das formas previstas no artigo 85.2 A da Lei 7/1985, reguladora das bases do réxime local, e sen prexuízo da externalización de determinadas prestacións materiais e/ou accesoria do servizo, sen que iso implique o cambio no modo de xestión, como son os da recollida de fracción vidro, a recollida de voluminosos, PaP e baixo demanda, o lavado de contedores, a atención dos puntos limpos, ou outras que se determinen.

2º. Aprobar inicialmente a modificación do modo de xestión do servizo público, en réxime de competencia delegada e con carácter intermunicipal, de recollida, transporte e tratamento de residuos de competencia local da Deputación Provincial de Ourense, pasando de xestión indirecta a xestión directa, de acordo coa documentación incorporada ao expediente de referencia.

3º. Someter o presente acordo de aprobación inicial a un trámite de información pública por un prazo de vinte (20) días hábiles, en cumprimento do establecido no artigo 83 da Lei 39/2015, do procedemento administrativo común das administracións públicas, mediante anuncio inserido na sede electrónica da Deputación e no Boletín Oficial da Provincia, para a presentación de reclamacións e suxestións, que, de ser o caso, deberán ser resoltas polo Pleno. No caso de non presentarse reclamacións ou suxestións en prazo, entenderase automaticamente elevado a definitivo o acordo de aprobación inicial.

3º.- APROBACIÓN DO CONVENIO MARCO DE COOPERACIÓN ENTRE A DEPUTACIÓN PROVINCIAL DE OURENSE E OS ENTES LOCAIS DA PROVINCIA PARA QUE A DEPUTACIÓN PRESTE, EN RÉXIME DE COMPETENCIA DELEGADA E CON CARÁCTER INTERMUNICIPAL, O SERVIZO DE RECOLLIDA DE ANIMAIS ABANDONADOS.-

D. José María Lago Cabo, do Grupo Popular, expón o contido da proposta.

D. Bernardo Varela López, do BNG, indica que o seu grupo está conforme co que se formula, se ben non se soluciona o problema das colonias felinas que é unha carga moi importante que impuxo a nova normativa aprobada polo Estado, facendo responsable aos concellos e sen ningún tipo de financiamento.

D. Álvaro Vila Araujo, do Grupo Socialista, manifesta que está de acordo co grave problema que supón as colonias felinas e que o convenio proposto se limita a dar asesoramento aos concellos. Solicita igualmente que na medida do posible se flexibilice a previsión da cláusula 4ª do convenio que se establece como mecanismo de garantía do cumprimento das obrigas económicas.

Non se producen máis intervencións e, co voto favorable do Grupo Popular (6), e a abstención do Grupo Socialista (4), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

1º.- Aprobar o Convenio marco de cooperación entre a Deputación Provincial de Ourense e os entes locais da provincia para que a Deputación preste, en réxime de competencia delegada e con carácter intermunicipal, o servizo de recollida de animais abandonados co seguinte contido:

PRIMEIRA.- Obxecto

Constitúe o obxecto do presente convenio regular as condicións para ordenar e xestionar, por parte da Deputación Provincial de Ourense, en réxime de competencia delegada e con carácter intermunicipal, o servizo de recollida de animais abandonados dependentes dos centros de recollida actualmente situados en Xinzo de Limia, O Carballiño, Muíños e A Rúa e nos futuros centros que poidan aportar os entes locais adheridos.

Na súa virtude, a Deputación Provincial asumirá o exercicio da competencia municipal de recollida e custodia dos animais abandonados nos termos municipais dos concellos que se adhiran ao convenio marco, implicando a dita adhesión a delegación do exercicio das ditas competencias nos termos detallados na cláusula 2ª.

Considérase que se adhiren ao presente convenio marco de cooperación os concellos que estean adheridos ao anterior convenio (BOP núm. 3 de 4 de xaneiro de 2013), agás que mostren a súa desconformidade. Recóllese como anexo I a relación de concellos adheridos a data de publicación deste convenio.

SEGUNDA.- Delegación de competencias relativas ao servizo de recollida de animais abandonados. Ámbito funcional, material, territorial e temporal.

1. En virtude da adhesión ao presente convenio, os entes locais delegan na Deputación Provincial o exercicio da competencia municipal de recollida e custodia dos animais abandonados.

2. A delegación da competencia de recollida e custodia dos animais abandonados comprenderá o exercicio das seguintes funcións:

- a) A ordenación do servizo, incluíndo o establecemento ou modificación das súas condicións de prestación e a elaboración e aprobación da correspondente ordenanza reguladora.
- b) O establecemento, imposición e ordenación das prestacións patrimoniais de carácter público que correspondan, de conformidade co establecido na lexislación reguladora das facendas locais.
- c) A xestión tributaria, inspección e recadación das prestacións patrimoniais de carácter público do servizo.
- d) A elección da forma de xestión do servizo, de entre as previstas na lexislación de réxime local.
- e) A planificación do servizo, establecendo, para tal efecto, a programación das actuacións que comprenda e as condicións da súa prestación que non requiran a aprobación dunha ordenanza, así como a planificación e programación dos investimentos que procedan para a súa ampliación, desenvolvemento ou mellora.
- f) A asunción, fronte terceiros, dos dereitos e obrigas que lle corresponderían ao ente local adherido en tanto que titular do servizo nas relacións xurídicas derivadas da prestación do servizo que xurdan durante a vixencia deste convenio marco.
- g) A dirección do persoal adscrito ao servizo, fronte ao que asumirá a condición xurídica de empregador, nos termos da lexislación laboral vixente, nos supostos en que o servizo delegado se xestione de modo directo pola propia Deputación Provincial.
- h) A organización das accións de recollida de animais, a realización de campañas de información entre a poboación, a xestión das adopcións e resolución sobre o destino que haxa de dárselles ós animais recollidos cuxo posuidor/a sexa descoñecido/a, a resolución de reclamacións e, en xeral, a adopción de cantos actos e disposicións cumpran para garanti-la prestación normal, regular e continuada do servizo.
- i) A contratación da xestión indirecta do servizo, se é o caso.

- k) A contratación da prestacións accesorias ao servizo, así como a contratación de obras, subministracións, asistencia técnicas ou servizos necesarios para a súa ordenación e xestión.
- l) A selección e contratación de persoal necesario para a xestión do servizo, no suposto de que este sexa xestionado de modo directo pola propia Deputación Provincial.
- m) A resolución dos recursos administrativos interpostos contra os actos ditados en exercicio da competencia delegada, e o exercicio de cantas accións administrativas ou xudiciais procedan en relación co servizo delegado.
- n) O fomento da adopción dos animais residentes nos centros mediante a formalización de convenios e acordos de colaboración con entidades de protección animal para mellorar a xestión dos animais recollidos e favorecer a súa entrega en adopción no período de tempo máis breve e nas mellores condicións posibles.

3. A competencia delegada exercerase no territorio dos entes locais que se encontren adheridos ao presente convenio. Na súa virtude, unicamente se recollerán aqueles animais abandonados que se atopen nos termos municipais incluídos no ámbito do convenio. Os animais recollidos serán trasladados aos centros de recollida de animais abandonados adscrito ao servizo situados, actualmente, nos municipios de Xinzo de Limia, Carballiño, Muíños e A Rúa.

4. A delegación de competencias terá plenos efectos durante a vixencia do convenio e ata a extinción do dito convenio para cada ente local adherido.

TERCEIRA.- Mecanismos de control do exercicio da delegación para prestar o servizo de recollida de animais abandonados.

1. A delegación do exercicio da competencia relativa ao servizo de recollida de animais abandonados non suporá cesión da titularidade da competencia, que en todo momento seguirá a ser municipal, delegándose unicamente o seu exercicio. Para tal efecto, establécense os mecanismos de control recollidos na presente cláusula, co obxectivo de garantir unha axeitada participación dos entes locais adheridos na toma das decisións fundamentais relativas ao servizo, así como un adecuado control e seguimento do uso da delegación por parte da Deputación Provincial, sen prexuízo de procura-la maior axilidade e eficacia no desenvolvemento da xestión delegada.

2. O exercicio das competencias delegadas por parte da Deputación Provincial requirirá informe previo favorable da Comisión de Seguimento prevista na cláusula 7ª nos seguintes supostos:

- a) Aprobar a ordenanza reguladora do servizo, ou das súas modificacións.
- b) Establecer, impor e ordenar as prestacións patrimoniais de carácter público.
- c) Elixir a forma de xestión do servizo, de entre as previstas na lexislación de réxime local.
- d) Planificar e programar os investimentos que procedan para ampliar, desenvolver ou mellorar o servizo, cando a súa contía exceda do 20 % do custo económico anual do servizo, ou cando sen acadar esta porcentaxe o seu financiamento deba realizarse mediante achegas económicas dos entes locais adheridos.
- e) Establecer as condicións para adxudicar contratos por importe de máis de 120.000,00 €, ou para subscribir convenios de colaboración relacionados coa prestación do servizo.
- f) Formalizar convenios con outras administracións públicas.
- g) Contratar persoal destinado en exclusiva ao servizo delegado, nos supostos de xestión directa pola propia Deputación, agás que non implique incremento da cadro de persoal.
- h) Subscribir os acordos a que se refire a cláusula 5ª.3, parágrafo primeiro, cos traballadores transferidos dende os entes locais.

3. O exercicio das competencias delegadas no resto de supostos poderá realizarse directamente polos órganos competentes da Deputación Provincial, sen prexuízo da dación de conta dos ditos actos á Comisión de Seguimento.

4. A Comisión de Seguimento poderá establecer directrices para o mellor funcionamento do servizo, que serán de obrigado cumprimento para a Deputación Provincial.

5. Os entes locais adheridos poderán obter ou solicitarlle, en calquera momento, información á Deputación Provincial sobre o exercicio das competencias delegadas, mediante escrito dirixido á Presidencia. A información deberá remitirse no prazo máximo de dez días hábiles dende que a solicitude tivese entrada no rexistro de entrada de documentos da Deputación Provincial.

Sen prexuízo deste dereito, a Deputación Provincial manterá informada, de xeito periódico, á Comisión de Seguimento sobre a marcha do servizo.

CUARTA.- Delegación de competencias para a xestión tributaria e recadación de impostos municipais dos entes locais adheridos, como garantía do cumprimento das obrigas económicas derivadas da adhesión ao convenio.

1. Os entes locais adheridos delegan na Deputación Provincial de Ourense, agás que manifesten o contrario no acordo de adhesión, as facultades de xestión tributaria e recadación dos seguintes tributos municipais:

- a) Taxas do servizo de recollida de residuos sólidos urbanos, incluída, de se-lo caso, a taxa polo uso do servizo do punto limpo.
- b) Imposto de bens inmobles (IBI)
- c) Imposto de actividades económicas (IAE)
- d) Imposto de vehículos de tracción mecánica (IVTM)
- e) Taxas polos servizos de abastecemento domiciliario de auga potable, sumidoiros e depuración de augas residuais.

Os entes locais poderán excluír da delegación todos ou algún dos tributos sinalados. No suposto en que non se delegue a xestión tributaria e recadación de ningún tributo, ou que o padrón tributario dos tributos delegados sexa insuficiente para garanti-lo cumprimento das obrigas económicas derivadas do presente convenio, os entes locais adheridos deberán constituír garantía en calquera das formas previstas na cláusula 6ª, ata cubri-lo total do importe anual estimado das obrigas económicas derivadas deste convenio que se prevexan.

No suposto de entes locais que xa tivesen delegadas na Deputación as competencias de xestión tributaria e recadación do IBI e/ou IVTM en virtude doutros acordos ou convenios, entenderase que a dita delegación se mantén nos termos establecidos na presente cláusula.

2. O contido da delegación, se é o caso, e para cada tributo, é o seguinte:

2.1. Imposto sobre bens inmobles (IBI):

A Deputación exercerá as facultades de xestión tributaria do imposto sobre bens inmobles (IBI) previstas no artigo 77 do Real decreto legislativo 2/2004, do 5 de marzo, polo que se aproba o texto refundido da Lei reguladora das facendas locais, que abranguerán:

- Concesión e denegación das exencións e bonificacións que procedan.
- Realización de liquidacións para determina-las débedas tributarias.

- Elaboración e emisión de listas, recibos e documentos cobratorios, así como liquidacións por ingresos directos.
- Práctica de notificacións colectivas en valores-recibo e individuais nas liquidacións por ingreso directo.
- Dita-la providencia de constrinximento e expedir relacións certificadas de debedores por valores en recibo e certificacións de descuberto.
- Liquidacións de xuros por demora.
- Resolución dos expedientes de devolución de ingresos indebidos.
- Resolución dos recursos que se interpoñan contra os actos anteriores.
- Actuacións para a asistencia e información ó contribuínte referidas ás anteriores materias.

Co fin de dotar da necesaria efectividade á xestión tributaria do imposto sobre bens inmobles, delégase igualmente na Deputación Provincial a facultade para, conforme co previsto no artigo 77 do Real decreto lexislativo 2/2004, do 5 de marzo, polo que se aproba o texto refundido da Lei reguladora das facendas locais, establecer acordos ou convenios de colaboración co Centro de Xestión Catastral e Cooperación Tributaria conducentes á formación do padrón do imposto deste termo municipal e ó ditado dos actos administrativos que motiven a modificación deste conforme se determina no artigo 77 da citada lei, agás que o concello, no acordo de adhesión ó convenio, expresamente exclúa esta delegación.

2.2. Imposto sobre actividades económicas (IAE):

A Deputación Provincial exercerá as facultades de xestión tributaria do imposto sobre actividades económicas (IAE) previstas no artigo 91 do Real decreto lexislativo 2/2004, do 5 de marzo, polo que se aproba o texto refundido da Lei reguladora das facendas locais, que abarcarán:

- Concesión e denegación de exencións que procedan.
- Realización das liquidacións conducentes á determinación das débedas tributarias.
- Emisión de instrumentos de cobro de recibos e liquidacións por ingreso directo.
- Resolución dos expedientes de devolución de ingresos indebidos.
- Resolución dos recursos que se interpoñan contra os actos anteriores.
- Actuacións para a información e asistencia ó contribuínte referidas ás anteriores materias.

2.3. Imposto sobre vehículos de tracción mecánica (IVTM):

A delegación da xestión deste tributo desenvolverase conforme coa seguinte distribución de funcións:

a) Obrigas do concello:

- Remisión do padrón (por única vez) para os efectos de proceder á súa informatización pola Deputación, remitindo, así mesmo, a relación de debedores dos últimos 4 anos, para os efectos de poder iniciarla executiva. Esta obriga refírese unicamente ós concellos que non tivesen delegada a competencia con anterioridade á entrada en vigor do presente convenio.
- Remitirlle á Deputación as altas, transferencias, baixas, cambios de domicilio, e demais circunstancias que poidan afectarlle á liquidación do imposto, de que teñan coñecemento.

(Datos da Xefatura de Tráfico).

- Remisión á Deputación das solicitudes de exención ou bonificación no imposto, que lle sexan presentados, co fin de proceder a elaboralo correspondente informe e expedirlo documento acreditativo desta.
- Remiti-las domiciliacións existentes.
- Remiti-la ordenanza fiscal aplicable.

b) Facultades de xestión da Deputación:

- Expedición do primeiro recibo no caso de alta de vehículos por matriculación.
- Concesión e denegación de exención e bonificación, se procede.
- Elaboración de listas, recibos e documentos cobratorios.
- Práctica de notificacións colectivas en valores-recibo e individuais.
- Dita-la providencia de constrinximento e expedir relacións certificadas de debedores por valores en recibo e certificacións de descuberto.
- Liquidación de xuros por demora.
- Resolución de expedientes de devolución de ingresos indebidos.
- Resolución dos recursos que se interpoñan contra os actos anteriores.
- Actuacións para asistencia e información ó contribuínte referidas ás anteriores materias.

2.4. Taxa de recollida de residuos sólidos urbanos (e rede de sumidoiros e depuración de augas residuais, se é o caso):

A delegación da xestión deste tributo desenvolverase conforme coa seguinte distribución de funcións:

a) Obrigas do concello:

- Remisión do padrón (por única vez) para os efectos de proceder á súa informatización pola Deputación remitindo, así mesmo, a relación de debedores dos últimos 4 anos, para os efectos de poder inicia-la recadación executiva. Esta obriga refírese unicamente ós concellos que non tivesen delegada a competencia con anterioridade á entrada en vigor do presente convenio.
- Remitirlle á Deputación, as altas, transferencias, baixas e demais circunstancias que poidan afectarlle á liquidación da taxa, de que teñan coñecemento.
- Remisión á Deputación das solicitudes de exención ou bonificación da taxa, que lle sexan presentados, co fin de proceder a elabora-lo correspondente informe e expedi-lo documento acreditativo desta.
- Remiti-las domiciliacións existentes.
- Remiti-la Ordenanza Fiscal aplicable, no caso de que esta non fose aprobada pola propia Deputación.

b) Facultades de xestión da Deputación:

- Concesión e denegación de exención e bonificación, se procede.
- Elaboración e emisión de listas, recibos e documentos cobratorios.
- Práctica de notificacións colectivas en valores- recibo individuais.
- Dita-la providencia de constrinximento e expedir relacións certificadas de debedores por valores en recibo e certificacións de descuberto.
- Liquidación de xuros por demora.
- Resolución dos expedientes de devolución de ingresos indebidos.
- Resolución dos recursos que se interpoñan contra os actos anteriores.
- Actuacións para asistencia e información ó contribuínte referidas ás anteriores materias.

2.5. Taxa de subministración de auga potable (de se-lo caso):

A delegación da xestión deste tributo desenvolverase conforme coa seguinte distribución de funcións:

a) Obrigas do concello:

- Remisión do Padrón anualmente, semestralmente, trimestralmente ou bimensualmente, segundo o criterio fixado na ordenanza, pois a lectura de contadores farase polo concello para os efectos de proceder á súa informatización pola Deputación, remitindo, así mesmo, a relación de debedores dos últimos 4 anos, para os efectos de poder inicia-la executiva.

- Remitirlle á Deputación, as altas, transferencias, baixas e demais circunstancias que poidan afectarlle á liquidación da taxa, de que teñan coñecemento.
- Remisión á Deputación das solicitudes de exención ou bonificación da taxa, que lle sexan presentados, co fin de proceder a elabora-lo correspondente informe e expedi-lo documento acreditativo desta.
- Remiti-las domiciliacións existentes.
- Remiti-la ordenanza fiscal aplicable.

b) Facultades de xestión da Deputación:

- Concesión e denegación de exención e bonificación, se procede.
- Elaboración e emisión de listas, recibos e documentos cobratorios.
- Práctica de notificacións colectivas en valores-recibo individuais.
- Dita-la providencia de constrinximento e expedir relacións certificadas de debedores por valores en recibo e certificacións de descuberto.
- Liquidación de xuros por demora.
- Resolución dos expedientes de devolución de ingresos indebidos.
- Resolución dos recursos que se interpoñan contra os actos anteriores.
- Actuacións para asistencia e información ó contribuínte referidas ás anteriores materias.

2.6. Contidos de aplicación para tódolos tributos:

As facultades delegadas de xestión tributaria e recadación en período voluntario e executivo, tanto de débedas por recibo como de liquidacións por ingreso directo e, se é o caso, de autoliquidacións, correspondentes ó imposto sobre bens inmoables, actividades económicas, vehículos de tracción mecánica, taxa de recollida de residuos sólidos urbanos e puntos limpos, e taxas de abastecemento de auga potable, sumidoiros e depuración (de se-lo caso) abarcarán cantas actuacións comprende a xestión tributaria e recadatoria de acordo coa lexislación aplicable e, en todo caso o seguinte:

- Practicar notificacións colectivas en débedas por recibo e individuais en liquidacións por ingreso directo.
- Fixar prazos de cobro en período voluntario en débedas por recibo.
- Establecer, de ser necesario, itinerarios de cobranza.
- Conferir e revogar ás entidades de depósito o carácter de entidades colaboradoras e establece-los límites da colaboración.

- Expedir relacións certificadas de debedores por recibos e certificacións de descuberto por liquidacións de ingreso directo.
- Dita-la providencia de constrinximento en recibos e certificacións de descuberto e resolve-los recursos contra o devandito acto administrativo.
- Liquidar xuros de demora para a súa aplicación en tódalas débedas en que aqueles sexan esixibles.
- Conceder ou denegar aprazamentos e fraccionamentos en voluntaria e executiva.
- Recibir e custodiar garantías de débedas ou dispensalas.
- Ordena-la constitución de hipotecas especiais.
- Ditar acordos de derivación de procedemento.
- Efectuar peritaxes e valoracións de bens embargados.
- Autorizar e presidir poxas.
- Acorda-la suspensión do procedemento.
- Iniciar terceirías de dominio e de mellor dereito.
- Propoñe-la adxudicación de predios ó concello, expedindo as certificacións necesarias para a súa inscrición nos rexistros públicos.

2.7. Outras condicións da delegación:

- 1) A Deputación Provincial de Ourense exercerá as facultades obxecto da presente delegación na forma que acorde a expresada corporación.
- 2) Para o exercicio das facultades delegadas, o servizo aterase ó ordenamento local e á lexislación aplicable de acordo co establecido na Lei reguladora das facendas locais, así como na normativa que en materia de xestión e recadación tributarias poida dita-la Deputación Provincial en uso da súa potestade regulamentaria prevista no artigo 106.2 da Lei de bases de réxime local, e na ordenanza municipal de xestión de tributos, segundo modelo uniforme facilitado pola Deputación.
- 3) Polo exercicio das funcións delegadas no presente acordo, a Deputación Provincial percibirá as compensacións económicas previstas na actual Ordenanza Provincial Fiscal vixente na materia.

As cantidades a que dea lugar a devandita compensación económica serán retiradas das entregas e liquidacións correspondentes que se lle realicen ó concello .

4) A devolución dos ingresos indebidos que, de se-lo caso, se produza, ocasionará a dedución da cantidade correspondente das liquidacións que deban rendérselle ó concello, sendo por conta da Deputación Provincial a devolución da parte de recarga de constrinximento percibida só nos casos en que a causa que dea orixe á devandita devolución sexa imputable á súa actuación no exercicio das facultades delegadas.

A compensación de débedas en período voluntario que, de conformidade coa lexislación aplicable, o concello puidera acordar, requirirá a intervención do servizo para a súa realización, debendo, en calquera caso, entenderse como débedas cobradas para os efectos do premio de cobranza e das recargas ou participacións que á Deputación Provincial lle poida corresponder nestas.

5) Os anticipos a conta da recadación rexeranse polo disposto na ordenanza fiscal antes mencionada. En todo caso, non se concederán anticipos sobre a recadación da taxa de recollida do lixo, dado que os gastos do servizo son asumidos integramente pola Deputación Provincial, ó estar delegada a xestión nesta última.

6) As cantidades que correspondan pola recadación obtida serán transferidas ó concello mensual ou trimestralmente, segundo o seu importe, acompañadas da documentación xustificativa, rendéndose anualmente, polo servizo a conta da súa xestión recadatoria. Das ditas cantidades deduciranse, se é caso, os gastos soportados pola Deputación Provincial pola prestación do servizo de recollida de residuos sólidos urbanos que non resultasen cubertos pola recadación da taxa de recollida de lixo, segundo a última liquidación dos custos do servizo aprobada.

QUINTA.- Traspaso de medios persoais e materiais adscritos ao servizo.

1. Os entes locais que deleguen na Deputación Provincial o exercicio das competencias de ordenación e xestión do servizo de recollida de animais abandonados mediante a súa adhesión a este convenio marco transferiranlle á Deputación Provincial o seu persoal laboral que estivese adscrito de xeito exclusivo ao servizo municipal preexistente, en caso de existir este, en virtude de sucesión de empresa e nas condicións establecidas no artigo 44 do Estatuto dos Traballadores.

2. En caso de revogación da delegación ou extinción por calquera causa da vixencia do convenio, o persoal transferido á Deputación Provincial reverterá á súa Administración de orixe, entendendo por tal ao ente local de procedencia. Os entes locais contraen expresamente,

para estes efectos, a obriga de asumir ao dito persoal nos supostos sinalados, recoñecéndoselle ademais ao dito persoal o dereito a conserva-las condicións e dereitos laborais adquiridos, se é o caso, en virtude de negociación coa Deputación Provincial conforme co establecido no apartado seguinte. Esta regra será de aplicación incluso no suposto no que a relación xurídica laboral do persoal transferido fora obxecto de subrogación por parte dunha entidade pública ou privada en virtude de xestión directa por entidade diferente á Deputación ou xestión indirecta do servizo.

A mesma regra seralles de aplicación aos entes locais que non transferiron persoal, pero para cuxo servizo tivese que ser contratado este persoal.

En todo caso, nos supostos en que o cadro de persoal adscrito ao servizo no momento da extinción do convenio marco se modifícase con respecto ao existente no momento da adhesión, tanto no relativo á identidade persoal como ao número de traballadores transferidos, o persoal que será obxecto de sucesión por parte dos entes locais determinarase en proporción á achega económica ao servizo delegado que lle correspondese ao ente local afectado e tendo en conta o criterio da maior proximidade xeográfica ao dito ente local do centro de traballo do traballador ou traballadores.

Nos supostos en que se extinga o convenio e o servizo non reverta as entes locais, senón que sexa suprimido por calquera causa, o custo da extinción dos contratos laborais integrárase na liquidación do convenio, distribuíndose entre os entes locais adheridos e a Deputación conforme cos regras establecidas na cláusula 6ª.

3. Ao abeiro do establecido no artigo 44.4 do Estatuto dos Traballadores, e en tanto non se produza a extinción dos convenios colectivos de orixe aplicables ao persoal transferido, a Deputación Provincial poderá negociar e subscribir acordos cos traballadores transferidos ou os seus representantes, que teñan por obxecto os dereitos e obrigas integrantes da relación laboral. Será preceptivo, para aprobar estes acordos, o informe previo da Comisión de Seguimento do convenio de cooperación.

Unha vez aprobados, estes acordos seranlles de aplicación aos/as traballadores/as afectados/as, que conservarán as condicións adquiridas na súa virtude incluso en caso de reversión ao ente local de orixe, ata a extinción da vixencia dos ditos acordos ou convenios.

Sen prexuízo do anterior, tanto os convenios colectivos de orixe como, se é o caso, os acordos acadados baixo a súa vixencia coa Deputación Provincial, manteranse ata a súa data de

expiración ou ata a entrada en vigor dun novo convenio colectivo que resulte de aplicación para estes traballadores/as.

4. Están adscritos ao servizo intermunicipal delegado xestionado pola Deputación Provincial tódolos medios materiais de titularidade municipal que ata ese momento estivesen destinados de forma exclusiva ao servizo de recollida de animais abandonados nos termos municipais dos entes locais adheridos. A Deputación subrogarase na titularidade dos ditos bens, e exercerá, por delegación, a totalidade das competencias que conforme coa lexislación vixente lle corresponda ao titular dos ditos medios materiais, que terán a consideración de bens de dominio e servizo público.

A Deputación Provincial poderá proceder ao cambio de adscrición dos ditos medios materiais e/ou á súa substitución por outros de nova adquisición ou procedentes doutros servizos provinciais, así como á súa baixa no inventario no momento no que a súa deterioración os volva inservibles para o servizo, sen que en ningún caso o cambio de adscrición poida supoñer unha diminución da calidade do servizo prestado en cada ente local.

SEXTA.- Réxime económico do servizo delegado.

1. O servizo delegado financiarase con cargo ás prestacións patrimoniais de carácter público do servizo. Os custos non cubertos por estas serán financiados pola Deputación Provincial e os entes locais adheridos, conforme coas regras que se establezan no Programa de cooperación coas entidades locais da provincia de Ourense para xestionar o servizo intermunicipal en réxime delegado de recollida de animais abandonados que se aprobe cada ano.

2. Unha vez aprobada e notificada aos entes locais, a liquidación será executiva, procedendo a Deputación Provincial a facela efectiva con cargo á recadación obtida nos tributos delegados. No caso de que a recadación fose insuficiente para aboa-los ditos custos, a Deputación poderá compensalos con calquera dereito de crédito que o ente local afectado teña contra a Deputación Provincial, trala tramitación previa do oportuno expediente de compensación de débedas.

No caso dos entes locais que non delegasen a xestión tributaria e recadación dos impostos a que se refire a cláusula 4ª, deberán proceder a aboa-la liquidación no prazo dun mes dende a súa notificación. De non aboala no dito prazo, a Deputación poderá proceder á compensar a débeda con calquera dereito de crédito que o ente local afectado teña contra a Deputación,

trala tramitación do oportuno expediente de compensación de débedas, ou ben poderá proceder á execución das garantías previstas no parágrafo seguinte.

3. Os entes locais que non deleguen na Deputación Provincial a competencia de xestión tributaria e recadación dos seus impostos conforme co sinalado na cláusula 4ª, garantirán o cumprimento das obrigas económicas derivadas do convenio mediante a constitución das seguintes garantías:

- Aval prestado por entidade de crédito, polo importe total das obrigas económicas estimadas anualmente, executable directamente a requirimento da Deputación.
- Seguro de caución polo importe total das obrigacións económicas estimadas anualmente, executable directamente a requirimento da Deputación.
- Acordo de afectación da participación en tributos do Estado ou da Comunidade Autónoma do ente local, polo que se autorice á Deputación a requirir ó seu favor o ingreso das cantidades adebedadas, sendo título executivo suficiente a certificación de descuberto expedida pola Intervención provincial. O acordo deberá afectar á participación en tributos ata o importe das obrigas económicas estimadas anualmente, e para a súa validez deberá acompañarse de certificación expedida polo secretario ou secretario – interventor do ente local no que se expresen as débedas líquidas, vencidas e esixibles do ente local coa Administración Xeral do Estado e calquera dos seus entes dependentes, a Comunidade Autónoma e calquera dos seus entes dependentes e a Tesourería da Seguridade Social, e se acredite que a cantidade afectada da participación en tributos do Estado ou da Comunidade Autónoma, segundo o caso, non se atopa xa afecta ao cumprimento doutras obrigas de calquera clase.

O importe das obrigas previsibles para cada exercicio a efectos da constitución das garantías determinarase mediante un estudo económico que será elaborado polo Servizo de Augas e Medio Ambiente da Deputación Provincial e aprobado pola Presidencia.

As garantías deberán actualizarse en cada exercicio, conforme co estudo de obrigacións previsibles. No exercicio 2024, as garantías deberán constituírse antes do día 1 de maio. Nos exercicios sucesivos, deberán actualizarse no prazo dun mes dende a comunicación da resolución da Presidencia aprobando o estudo económico.

A falla de constitución ou actualización das garantías dará lugar á resolución automática do convenio co ente local incumpridor. A Deputación Provincial, tralo informe previo da

Comisión de Seguimento, acordará o cesamento do servizo e a reversión dos medios humanos e materiais que procedan, que en todo caso será notificado cunha antelación mínima dun mes respecto da data da súa efectividade. Posteriormente, aprobarase a liquidación definitiva do convenio para o ente local afectado.

Non obstante o anterior, se o ente local constituíse ou actualizase debidamente a garantía esixida durante a tramitación e antes da notificación da resolución de cesamento do servizo, esta quedará sen efecto, continuando a vixencia do convenio.

SÉTIMA.- Comisión de seguimento.

1. As funcións de seguimento, control, informe e interpretación do presente convenio lle corresponderán a unha Comisión de Seguimento de carácter paritario, integrada polo seguintes membros:

a) En representación da Deputación Provincial:

- A presidencia, ou deputado/a no/a que delegue. Corresponderanlle, ademais, as funcións de presidencia da comisión.
- O/A secretario/a xeral, o/a interventor/a, o/a tesoureiro/a, o/a director/a da Área de Medio Ambiente, o/a xefe/a do Servicio de Medio Rural e o/a director/a da rede de centros de acollida de animais abandonados, ou funcionarios/as que legalmente os substitúan, en tódolos casos con voz pero sen voto.

b) En representación dos concellos:

b.1.- A alcaldía, ou concelleiro/a no/a que delegue, do Concello de Xinzo de Limia.

b.2. - A alcaldía, ou concelleiro/a no/a que delegue, do Concello do Carballiño.

b.3.- Un representante da agrupación de concellos de Muíños, Bande, Lobeira, Entrimo e Lobios.

b.4.- Un representante da agrupación de concellos da Rúa, Petín, Larouco e Vilamartín de Valdeorras.

Todos eles poderán participar coa asistencia do persoal técnico que consideren conveniente, contando este persoal con voz pero sen voto.

b.5.- Un representante de cada comarca, ou agrupación de concellos, que se adhiran posteriormente.

Os representantes dos apartados b.3, b.4 e b.5 anteriores serán elixidos entre si, por maioría simple de votos emitidos. O voto emitirase mediante resolución da alcaldía a requirimento da Deputación, no prazo que esta sinale.

Os representantes dos apartados b.3, b.4 e b.5 actuais serán os elixidos tralas eleccións municipais do ano 2023 e manteranse ata que o soliciten máis da metade dos alcaldes dos entes locais adheridos de cada comarca ou agrupación. No anexo II recóllense os actuais titulares e suplentes.

2. As funcións de secretaría das comisións de seguimento e da Comisión Xeral corresponderanlle a un funcionario/a do Gabinete de Asesoría Xurídica e Asistencia a Municipios da Deputación.

3. A comisión de seguimento terá carácter paritario, correspondéndolle un voto a cada ente local e, á Deputación Provincial, un número de votos equivalente á suma do número dos votos dos entes locais. Para estes efectos, entenderase que os alcaldes que forman parte da Comisión en representación das súas comarcas ou agrupacións, disporán de tantos votos como concellos adheridos representen.

4. Son funcións da comisión as seguintes:

- a) Ser informada, polo menos anualmente, do estado de execución do convenio, así como das incidencias advertidas en cada exercicio.
- b) Informar calquera modificación ou novación do presente convenio.
- c) Coñece-las propostas, queixas ou suxestións que as partes poidan formularlles ao resto de entidades asinantes.
- d) Informa-los supostos de resolución do convenio.
- e) Emiti-los informes previstos na cláusula terceira do convenio.
- f) Informa-las solicitudes de adhesión ao convenio que se formulen con posterioridade a entrada en vigor do presente convenio.

5. A comisión de seguimento adoptará os seus acordos por maioría simple, agás naqueles casos nos que o presente convenio estableza un quórum diferente.

6. No non previsto no presente convenio, o funcionamento das comisións de seguimento rexerase polas normas de funcionamento de órganos colexiados establecidas no Título II da Lei do réxime xurídico das administracións públicas e procedemento administrativo común.

OITAVA.- Réxime xurídico.-

O presente convenio terá natureza administrativa. A súa revisión en vía xudicial, así como a dos actos e acordos ditados na súa execución ou derivados deste, corresponderalles ós órganos da xurisdición contencioso - administrativa.

NOVENA.- Modificación do convenio.

O Convenio poderá ser modificado en calquera momento requirindo o acordo da maioría absoluta dos concellos adheridos. A comisión de seguimento será informada da proposta de modificación. O acordo de modificación será integrado no clausulado do convenio trala correspondente tramitación administrativa.

DÉCIMA.- Causas de resolución do convenio.-

1. Serán causas de resolución do convenio (total ou parcial) as seguintes:

- a) Por mutuo acordo entre as partes.
- b) Por baixa voluntaria de calquera dos entes locais adheridos, formulada cunha antelación mínima de seis meses ao remate de cada ano natural. En todo caso, a efectividade da resolución de baixa entenderase referida sempre ó 1 de xaneiro do exercicio seguinte. A baixa dos entes locais non dará dereito á devolución das cantidades aboadas en concepto de compensación aos concellos de Xinzo de Limia, O Carballiño, Muíños e A Rúa pola achega das instalacións dos centros de recollida de animais abandonados.
- c) Por incumprimento de obrigas convencionais esenciais. Para a aplicación desta causa de resolución, a entidade interesada en resolve-lo convenio porá previamente en coñecemento da comisión de seguimento a existencia da dita causa de resolución, e a súa intención de resolvelo. Unha vez realizada esta comunicación á presidencia da comisión, esta procederá a convocar á comisión, que deberá reunirse nun prazo máximo de quince días hábiles, co fin de emitir informe sobre a procedencia da resolución. Emitido o informe da comisión, a entidade interesada adoptará a resolución que proceda.

2. Unha vez resolto ou extinguido o convenio, este entrará en liquidación, que formulará a Deputación Provincial, trala audiencia previa do ente local ou entes locais afectados, e na que se incluírán os danos e perdas ocasionados polo incumprimento de obrigas convencionais, de se-lo caso. O pago das obrigas derivadas da dita reclamación poderá reclamárselle á entidade que se considere responsable, e contra o rexeitamento expreso ou tácito desta poderán

interpoñerse os recursos e exercerse as accións contempladas no ordenamento vixente. Na liquidación incluíranse tamén as determinacións sobre o destino dos medios humanos e materiais afectos ao servizo.

UNDÉCIMA.- Duración do convenio.

O presente convenio marco de cooperación terá vixencia indefinida.

DUODÉCIMA.- Procedemento de adhesión ao convenio.

O presente convenio, ten carácter de convenio marco, aberto á adhesión do resto de entes locais interesados en incorporarse ao servizo intermunicipal delegado.

Os entes locais interesados poderán adherirse ao presente convenio marco mediante acordo do pleno respectivo no que se aprobe a dita adhesión, coa aceptación expresa da totalidade das súas cláusulas.

A adhesión será eficaz no prazo dun mes dende a recepción da comunicación do acordo de adhesión no rexistro xeral de documentos da Deputación.

ANEXO I. ENTES LOCAIS ADHERIDOS AO CONVENIO PUBLICADO NO BOP NÚM. 3 DE 4 DE XANEIRO DE 2013

Relación de entes locais que se encontran adheridos ao convenio marco publicado no BOP núm. 3 de 4 de xaneiro de 2013 e que, de acordo co establecido na Cláusula Primeira se entenden adheridos ao presente convenio.

AGRUPACIÓN DE CONCELLOS

Lobeira

Muíños

Bande

Entrimo

Lobios

AGRUPACIÓN DE CONCELLOS

A Rúa

Petín

Larouco

Vilamartín de Valdeorras

COMARCA DE O CARBALLIÑO

O Carballiño

O Irixo

Punxín

Piñor

Maside

Beariz

Boborás

San Amaro

San Cristovo de Cea

COMARCA DE A LIMIA

Xinzo de Limia

Os Blancos

Porqueira

Rairíz de Veiga

Sandiás

Baltar

Trasmiras

Vilar de Santos

Calvos de Randín

COMARCA DO RIBEIRO

Arnoia

Castrelo de Miño

Cenlle

Leiro

Melón

Ribadavia

Cortegada

Carballeda de Avía

Avión

COMARCA DE OURENSE

Esgos

Pereiro de Aguiar

Toén

A Peroxa

Nogueira de Ramuín

Amoeiro

Taboadela

Vilamarín

San Cibrao das Viñas

Coles

COMARCA DE VALDEORRAS

Rubiá

O Barco de Valdeorras

Carballeda de Valdeorras

O Bolo

A Veiga

COMARCA DE VIANA

Vilariño de Conso

A Gudiña

Viana do Bolo

COMARCA DE ALLARIZ – MACEDA

Allariz

Baños de Molgas

Maceda

Paderne de Allariz

Xunqueira de Ambía

Xunqueira de Espadañedo

COMARCA DE TRIVES

San Xoán de Río

Manzaneda

Chandrexa de Queixa

A Pobra de Trives

TERRA DE CELANOVA

Cartelle

A Merca

A Bola

Padrenda

Verea

Celanova

Ramirás

Pontedeva

Quintela de Leirado

TERRA DE CALDELAS

A Teixeira

Montederramo

Parada do Sil

Castro Caldelas

COMARCA DE VERÍN

Ríos

Cualedro

Castrelo do Val

Laza

Vilardevós

Oímbra

Monterrei

Verín

ANEXO II REPRESENTANTES E SUPLENTE COMARCAIS NA COMISIÓN DE SEGUIMIENTO

Os representantes e suplentes comarcais na comisión de seguimento na data de publicación deste convenio:

AGRUPACIÓN DE CONCELLOS		TITULAR	SUPLENTE
	Representante	LOBIOS	LOBEIRA
AGRUPACIÓN DE CONCELLOS		TITULAR	SUPLENTE
	Representante	A RÚA	VILAMARTÍN
COMARCA DE O CARBALLIÑO		TITULAR	SUPLENTE

	Representante	O CARBALLIÑO	BEARIZ
COMARCA DE A LIMIA		TITULAR	SUPLENTE
	Representante	OS BLANCOS	PORQUEIRA
COMARCA DO RIBEIRO		TITULAR	SUPLENTE
	Representante	RIBADAVIA	CENLLE
COMARCA DE OURENSE		TITULAR	SUPLENTE
	Representante	TOÉN	VILAMARÍN
COMARCA DE VALDEORRAS		TITULAR	SUPLENTE
	Representante	A VEIGA	
COMARCA DE VIANA		TITULAR	SUPLENTE
	Representante	VILARIÑO DE CONSO	VIANA DO BOLO
COMARCA DE ALLARIZ -MACEDA		TITULAR	SUPLENTE
	Representante	PADERNE DE ALLARIZ	BAÑO DE MOLGAS
TERRA DE TRIVES		TITULAR	SUPLENTE
	Representante	SAN XOÁN DE RÍO	MANZANEDA
TERRA DE CELANOVA		TITULAR	SUPLENTE
	Representante	CARTELLE	A MERCA
TERRA DE CALDELAS		TITULAR	SUPLENTE
	Representante	A TEIXEIRA	MONTEDERRAMO
COMARCA DE VERÍN		TITULAR	SUPLENTE
	Representante	CUALEDRO	CASTRELO DO VAL

2º.- Este convenio será obxecto de publicación no Boletín Oficial da Provincia de Ourense e na sede electrónica da Deputación Provincial de Ourense para xeral coñecemento.

4º.- APROBACIÓN DO PROGRAMA DE COOPERACIÓN COAS ENTIDADES LOCAIS DA PROVINCIA DE OURENSE PARA O SERVIZO DE RECOLLIDA DE ANIMAIS ABANDONADOS PARA O EXERCICIO 2024.-

D. José María Lago Cabo, do Grupo Popular, expón o contido da proposta.

Non se producen intervencións e, co voto favorable do Grupo Popular (6) e a abstención do Grupo Socialista (4), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

1º.- Aprobar o programa de cooperación coas entidades locais da provincia de Ourense para o servizo de recollida de animais abandonados co seguinte contido:

PREAMBULO

Unha das competencias propias das deputacións provinciais é a asistencia e a cooperación xurídica, económica e técnica aos municipios, especialmente aos de menor capacidade económica e de xestión (artigo 36.1.b) da Lei 7/1985, do 2 de abril, reguladora das bases do réxime local).

No exercicio de esta competencia, dende o ano 2013, a Deputación Provincial de Ourense ven a prestar o servizo de recollida de animais abandonados en réxime de competencia delegada e con carácter intermunicipal.

A través deste servizo, as entidades locais pódense adherir a un convenio marco de alcance xeral delegando as competencias que en esta materia lle atribúe o artigo 22 e seguintes da Lei 4/2017, de 3 de outubro, de protección e benestar dos animais de compañía en Galicia.

Mediante o presente programa, a Deputación Provincial de Ourense concreta as accións que nesta materia pon a disposición dos entes locais adheridos ao Convenio marco de cooperación entre a Deputación Provincial de Ourense e os entes locais da provincia para que a Deputación preste, en réxime de competencia delegada e con carácter intermunicipal, o servizo de recollida de animais abandonados así como outras accións das que poderán ser beneficiarias, tanto os entes locais adheridos ao dito convenio como aqueles outros que soliciten a correspondente asistencia técnica. Así mesmo regula as condicións económicas do servizo.

1) Obxecto.

1. Constitúe o obxecto deste programa establecer, as concretas accións e prestacións que comprende o servizo de recollida de animais abandonados prestado pola Deputación Provincial de Ourense en réxime de competencia delegada e con carácter intermunicipal así como a forma de financiación do custe do servizo no exercicio 2024.

2. Este programa adóptase no exercicio da competencia provincial para prestarlles asistencia e cooperación aos concellos e demais entidades locais en materia de servizos municipais prevista no artigo 36.1.b) da Lei 7/1985, do 2 de abril, reguladora das bases do réxime local, tendo en conta as competencias de xestión do servizo público de recollida de animais abandonados dos municipios da provincia.

2) Ámbito territorial.

O ámbito territorial no que se aplicará este Programa será:

1. Para o exercicio das accións recollidas na cláusula 3).1.a), os termos municipais dos entes locais adheridos ao convenio marco de cooperación entre a Deputación Provincial de Ourense e os entes locais da provincia para que a Deputación preste, en réxime de competencia delegada e con carácter intermunicipal, o servizo de recollida de animais abandonados (en adiante Convenio).

2. Para o exercicio das accións recollidas na cláusula 3).1.b) e c), os termos municipais dos entes locais adheridos ao Convenio así como o dos concellos que as soliciten.

3) Condicións da prestación do servizo.

1. As accións que prestará a Deputación Provincial de Ourense son:

a) Recollida e custodia de animais: A recollida será efectuada polo servizo de lacería da Rede Provincial nos seguintes casos:

a. Animais da especie canina:

i. Recollida de cans abandonados, extraviados ou cuxa situación aconselle a súa retirada, por risco para a integridade do animal ou das persoas sempre que poidan ser capturados de maneira inmediata.

Nos casos en que a situación dos animais non permita a recollida por medios normais (mandas asilvestradas, animais moi esquivos situados en lugares onde non sexa factible a utilización de dardos anestésicos...) os técnicos do servizo ofrecerán ás autoridades locais a súa colaboración na elaboración de plans de actuación que faciliten a súa captura.

ii. Recollida de cans de propiedade particular da veciñanza, nas condicións exixidas pola lexislación vixente.

iii. Identificación e rexistro no REGIAC dos animais recollidos, tanto se son devoltos ao/á propietario/a ou entregados en adopción.

iv. Custodia e atención dos animais recollidos durante o período legal en que deben permanecer a disposición do/a propietario/a así como no período posterior ata a súa adopción.

v. Esterilización de tódolos animais como paso previo asúa entrega en adopción.

b. Outras mascotas:

i. Gatos domésticos (enténdese por aqueles que viven no interior dos domicilios en compañía permanente dos/as propietarios/as e, polo tanto, son susceptibles da

súa entrega en adopción): Xestionar a adopción definitiva ou provisional (acolida por entidades de protección animal ou particulares) nos casos en que sexa imprescindible (propietarios falecidos ou trasladados a residencias sen familiares próximos). Ata o momento da entrega ao/á novo/a propietario/a ou adóptante permanecerán na residencia onde se encontren.

- ii. Outras mascotas, incluíndo gatos comunitarios, furóns, etc.: So se recollerán animais en urxencia vital (aqueles individuos que pola súa situación requiran asistencia inmediata para garantir a súa supervivencia: enfermos, accidentados).

b) Asesoramento en materia de:

- a. Colonias felinas. Asesoramento en canto ás actuacións a acometer polos entes locais: Elaboración de plans de actuación e recomendacións de seguimento.
- b. Outros gatos comunitarios: Recomendacións de manexo.
- c. Estudio de calquera situación non prevista que poida presentarse relativa a animais de compañía e recomendacións de actuación.

- c) EQUIPAMENTOS. Poñerase ao dispor dos entes locais os equipamentos necesario para a captura de animais, especialmente dos gatos comunitarios: gaiolas-trampa, lazos, redes, etc. en réxime de préstamo por un período de tempo determinado ou para un cometido concreto. Nestes casos é necesario solicitalo previamente por escrito acompañado dun compromiso de custodia dos materiais.

2. A Deputación Provincial de Ourense realizará o servizo mediante xestión directa sen prexuízo dos convenios que poida celebrar coas asociacións de protección e defensa dos animais.

4) Retribucións económicas.

1. O servizo delegado financiarase con cargo ás prestacións patrimoniais de carácter público do servizo, as aportacións públicas ou privadas que se reciban e con fondos propios da Deputación Provincial de Ourense.

2. O custo das actuacións recollidas na letra 1.a) da cláusula 3) será en parte financiado coas aportacións dos entes locais adheridos: 1 euro por habitante/ano.

Para estes efectos, na liquidación terase en conta a poboación de dereito segundo a cifra oficial de poboación vixente no momento de efectuarse a liquidación.

De ser o caso, a Deputación Provincial asumirá o resto dos custos.

3. O custe do resto de actuacións será asumida, integramente, pola Deputación Provincial de Ourense.

4. A liquidación ás entidades locais aprobarase e notificarase anualmente. As entidades locais disporán dun prazo de trinta días naturais para efectuar o pagamento. Unha vez transcorrido o mencionado prazo, sen realizar o pagamento das liquidacións correspondentes, procederase conforme ao disposto na cláusula SEXTA do Convenio ou cláusula que a substitúa.

5) Procedemento de acceso ao servizo.

1. As entidades locais que estean adheridas ao convenio quedan automaticamente adheridos ás actuacións deste programa sen necesidade de realizar trámite algún, agás que manifesten o contrario.

2. O resto de entidades locais que queiran acceder ao servizo deberán presentar unha solicitude previa dirixida á Presidencia da Deputación, a través do rexistro electrónico dispoñible na sede electrónica da Deputación Provincial (www.sede.depourense.es) ou en calquera dos lugares previstos no artigo 16.4 da Lei 39/2015, de 1 de outubro, do procedemento administrativo común das administracións públicas, na que se indicará o tipo de servizo solicitado. Acompañarase o acto administrativo de adhesión ao convenio adoptado polo órgano competente nos termos establecidos no Convenio.

3. Deberá solicitarse, como mínimo, cunha antelación de quince días hábiles a data na que se interese a actuación. Por razóns organizativas non se atenderan aquelas peticións cun intervalo menor, agás situacións de emerxencia ou urxencia debidamente xustificadas, imposibles de prever con dita antelación.

6) Baixa voluntaria do programa por parte das entidades locais adheridas.

A resolución ou extinción do Convenio ou a baixa voluntaria deste programa respecto de calquera das entidades locais adheridas, terá como efecto que a Deputación deixe de prestar o servizo. Dita resolución ou extinción levarase a cabo polos trámites establecidos no Convenio.

7) Vixencia e extinción do programa.

Este programa estará vixente dende o día seguinte a súa publicación no Boletín Oficial de Provincia de Ourense e ata o 31 de decembro de 2024.

8) Natureza e réxime xurídico.

Este programa ten natureza administrativa, correspondéndolle á xurisdición contencioso-administrativa a resolución das controversias sobre a súa validez, efectos e extinción.

2º.- Este programa será obxecto de publicación no Boletín Oficial da Provincia de Ourense para xeral coñecemento.

5º.- DACIÓN DE CONTA DO ACORDO DA XG DE EXPROPIACIÓN FORZOSA PARA A EXECUCIÓN DAS OBRAS DE “ACONDICIONAMENTO DA OU-0304 A ARMADA (OU-404) – ASTARIZ (OU-402) ENTRE OS PUNTOS QUILOMÉTRICOS 5+200 E 10+300, (FASE 2). CONCELLO DE CASTRELO DE MIÑO”.-

Dáse conta do acordo adoptado pola Xunta de Goberno, na sesión do día 13 de maio de 2024, relativo á expropiación forzosa para a execución das obras de “acondicionamento da OU-0304 A Armada (OU-404) – Astariz (OU-402) entre os puntos quilométricos 5+200 e 10+300, (fase 2) no Concello de Castrelo de Miño”.

Os membros da Comisión quedan informados.

6º.- DACIÓN DE CONTA DO ACORDO DA XG DE EXPROPIACIÓN FORZOSA PARA A EXECUCIÓN DAS OBRAS DE “ACONDICIONAMENTO E MELLORA INTEGRAL NA OU-0102 XUNQUEIRA DE AMBÍA - POLÍGONO SAN CIBRAO. CONCELLO DE XUNQUEIRA DE AMBÍA”.-

Dáse conta do acordo adoptado pola Xunta de Goberno, na sesión do día 13 de maio de 2024, relativo á expropiación forzosa para a execución das obras de “acondicionamento e mellora integral na OU-0102 Xunqueira de Ambía - Polígono San Cibrao no Concello de Xunqueira de Ambía”.

Os membros da Comisión quedan informados.

7º.- MOCIÓN DO GRUPO POPULAR PARA DEMANDAR AO GOBERNO DE ESPAÑA A CONSTRUCCIÓN DA ESTACIÓN FERROVIARIA DE MERCADORÍAS NO POLÍGONO INDUSTRIAL DE SAN CIBRAO DAS VIÑAS.-

Dª Marta Nóvoa Iglesias, do Grupo Popular, explica o contido da moción do seu grupo e sinala que esta iniciativa foi trasladada a distintas administracións públicas e que os empresarios do Polígono teñen realizado un anteproxecto desta infraestrutura polo que sería moi importante impulsala desde a Deputación Provincial.

D. Bernardo Varela López, do BNG, sinala que é un tema que xa foi debatido neste Pleno e que se considera de moito interese para a nosa provincia. Engade que unha iniciativa similar foi presentada no senado polo grupo do BNG.

D. Álvaro Vila Araujo, do Grupo Socialista, sinala que o seu grupo, como sempre, será coherente co sentido do voto e pregunta se teñen información do terreo que sería necesario para esta infraestrutura.

Dª Marta Nóvoa Iglesias, do Grupo Popular, contesta que segundo o anteproxecto e segundo lle informan, a Xunta de Galicia xa ten adquiridos 103.560 m², se ben serían necesarios en torno a 26.000 m² máis pendentes de adquirir para que urbanisticamente xa cumpran os requisitos necesarios.

Non se producen máis intervencións e, co voto favorable do Grupo Popular (6) e a abstención do Grupo Socialista (4), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

- Demandar ao Goberno de España, a través do Ministerio de Transportes, Mobilidade e Axenda Urbana, que inicie os trámites para a construción dunha nova estación ferroviaria de mercadorías no Polígono Industrial de San Cibrao das Viñas.

8º.- MOCIÓN DO GRUPO POPULAR PARA DOTAR NESTE 2024 AO 100% DOS FOGARES OURENSÁNS CON CONEXIÓN DE FIBRA ÓPTICA.-

D. Xosé Miguel Pérez Bleca, do Grupo Popular, expón o contido da moción pondo o acento na taxa do 72% de vivendas da provincia con acceso á fibra óptica fronte ao 90% da media estatal.

D. Bernardo Varela López, do BNG, sinala que en principio estaría de acordo con esta demanda sen descartar que poida existir outras alternativas á fibra óptica. En todo caso valorará realizar algunha aportación á moción.

D. Aurentino Alonso Araujo, do Grupo Socialista, recorda que España é o segundo país da Unión Europea en cobertura de fibra óptica, se ben debemos ter en conta a orografía e a dispersión que temos en Galicia para esta infraestrutura. Engade que o Grupo Socialista sempre antepón os intereses da provincia aos intereses do seu partido polo que non ten ningún tipo de problema de instar ao Goberno Central.

Non se producen máis intervencións e, co voto favorable do Grupo Popular (6) e a abstención do Grupo Socialista (4), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

1. Instar ao Goberno de España a que se facilite unha cronoloxía das actuacións para levar a cabo para o despregamento da rede e quen a vai realizar.

2. Instar ao Goberno de España para que informe cando ten previsto chegar a cubrir as zonas escuras na provincia de Ourense.
3. Instar ao Goberno de España a que facilite como se vai resolver a problemática á hora de xestionar a conexión coas operadoras cando esta xa ten despregada a súa rede pero aos veciños lle indican que é "tecnicamente inviable".
4. Instar ao Goberno de España a que informe que ámbito territorial está previsto cubrir coa última convocatoria de axudas.
5. Instar ao Goberno de España para que habilite un sistema de reclamacións para que os cidadáns poidan remitir as súas queixas e reclamacións de maneira clara e directa.

9º.- MOCIÓN DO GRUPO SOCIALISTA PARA A POSTA EN MARCHA DUN PLAN PROPIO DA DEPUTACIÓN DE OURENSE DE AXUDAS DESTINADAS A CONCELLOS DE MENOS DE 20.000 HABITANTES PARA A COMPRA E REHABILITACIÓN DE VIVENDAS PARA ALUGUER OU USO SOCIAL.-

D. Álvaro Vila Araujo, do Grupo Socialista, expón o contido da súa moción.

D. Bernardo Varela López, do BNG, sinala que ten moitas dúbidas de que a Deputación Provincial teña competencias en materia de vivendas e que seguramente 20.000 € a cada concello non soluciona a problemática existente no acceso á vivenda que existe na provincia.

Dª Ana Patricia Torres Madureira, do Grupo Popular, sinala que a demanda da moción implica un coste moi importante para o orzamento provincial, polo que tamén se debe valorar que sexa cada concello o que decida utilizar fondos do Plan Cooperou para este tipo de iniciativas.

D. Álvaro Vila Araujo, do Grupo Socialista, insiste en que os concellos teñen un serio problema en materia de vivendas e que se conseguisen sacar adiante esta iniciativa poríanse no mercado 91 vivendas na provincia.

D. Bernardo Varela López, do BNG, sinala que unha posible alternativa podería ser destinar fondos para eliminar ou solucionar os problemas existentes en moitos núcleos de poboación coas vivendas en estado ruinoso.

Dª Ana Patricia Torres Madureira, do Grupo Popular, indica que na Xunta de Portavoces poderíase buscar alternativas para intentar que a moción sexa aprobada.

D. Álvaro Vila Araujo, do Grupo Socialista, sinala que se a Deputación Provincial consegue sacar adiante este programa pode ser un exemplo a nivel autonómico e nacional.

O presidente da Comisión sinala que debemos reflexionar sobre a importante dotación económica que se solicita, xa que pode limitar moito a capacidade económica da Deputación Provincial, sen deixar de recoñecer que en moitos concellos si existe un problema de acceso á vivenda.

Non se producen máis intervencións e, co voto favorable do Grupo Socialista (4) e a abstención do Grupo Popular (6), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

- Instar á Deputación de Ourense a poñer en marcha un plan propio de axudas destinadas a concellos de menos de 20.000 habitantes para a compra e/ou rehabilitación de vivendas para o seu aluguer ou uso social, que sirva de complemento aos diferentes plans estatais e autonómicos en liza, xa que estes tan só cobren unha parte do orzamento das obras, non podendo moitos concellos de asumir o resto dos custos. Este plan veríase recollido no futuro Orzamento 2025 cunha dotación de 1.820.000€, dos cales correspondería unha axuda anual de 20.000€ a cada un dos 91 concellos, poñendo así a disposición anualmente para aluguer ou uso social un parque de 91 novas vivendas na provincia de Ourense.

10º.- MOCIÓNS DE URXENCIA.- Non se presentan.

11º.- ROGOS E PREGUNTAS.- Non se formulan

E, ás 18.20 horas, dáse por finalizada a reunión, redactándose a presente acta que se asinará electronicamente. Dou fe.